

# Tecnologia moderna per tuts

■ (anr/ld) En divers discurs a la maisa radunda han pudì sa metter d'accord ils divers acturs che procuran per ina rait moderna da comunicaziun en Svizra.

Ina rait da comunicaziun moderna e da gronda prestaziun è da muntada essenziala per nosa economia, dentant er per las chasadas privatas, ha punctuà Marc Furrer, il president da la cumissiuun ComCom, a chaschun d'ina conferenza da medias a Berna. La construcziun da la nova rait saja necessaria per dar dumogn als basegns dals clients. Mintga 18 mais redubleschia la dumonda da capaciad per la transmissiuun da datas electronicas. ComCom vul promover la realisaziun da la nova rait da fibra da vaider en tut las regiuns da la Svizra e procurar per concorrenza.

Gia dapi intgins onns è Swisscom ensem cun interpresas privatas vidlonder da construir ina rait da fibra da vaider en tut il territori da la Svizra. La realisaziun d'ina tala rait da comunicaziun è ina incumbensa d'ina entira generaziun e custa var 20 milliardas francs. Ils contracts che Swisscom ha fatg cun las interpresas privatas en vegnids contestads da la Cumissiuun da concorrenza. Quella ha criticà la mancanza da concorrenza e vul evitar ina situaziun da monopol.



**Marc Furrer, il president da ComCom, ha orientà la pressa davart ils resultats da mediaziun davart la construcziun d'ina nova rait da comunicaziun.**

FOTO L. DEPLAZES

## Mediaziun

En vista quella situaziun ha radunà ad ina maisa radunda la ComCom (il regulatur da la confederaziun en dumon-

das da comunicaziun), l'onn 2008 tut ils acturs da la bransch. Finamira è stada da coordinar las activitads per la renovaziun da la veglia rait d'arom, d'evi-

tar lavurs dublas e da garantir en l'avvegnir la concorrenza. Finalmain èsi ussa reussì da crear las cundiziuns da basa necessarias per uschia pudair cuntinuar cun la construcziun da la nova rait fin tar las singulas chasadas. En l'avvegnir vul ins evitar lavurs da construcziun dublas e tuttina dar al consument la pussaivladad d'eleger tranter plirs purschiders. En quest senn vegn costruì ina rait cun quatter lingias singulas che lubeschian a pliras interpresas da las utilizar senza discriminaziun. Sin fundament dals resultats da la maisa radunda han Swisscom e las interpresas privatas (ovras electricas) adattà lur contracts, uschia che la realisaziun è uss garantida.

Actualmain disponan var 10% da las chasadas d'ina colliaziun cun cabel da fibra da vaider. Fin l'onn 2015 vul ins colliar 30% cun la nova rait. Sco quai che Marc Furrer ha confermà vul ins er evitar in foss digital tranter las grondas aglomeraziuns ed il territori da muntogna. Cumbain che la construcziun en territoris perifers è bler pli chara na duess quai dar naginas differenzas da las tariffas tranter las diversas regiuns, ha manegià Furrer anvers l'Agentura da novitads rumantscha.